


李文忠公全集

奏稿

二六



李文忠公奏稿

卷之三十六目錄

近省隄河工費摺

光緒六年正月二十七日

陳占鼈請照原獎片

光緒六年正月二十七日

議購鐵甲船摺

光緒六年二月十九日

覆奏防兵情形片

光緒六年二月十九日

德國兵官換給寶星摺

光緒六年二月二十六日

蚊船四隻撥赴南洋片

光緒六年二月二十六日

紳捐備濟社片

光緒六年二月二十六日

直隸請停分發摺

光緒六年二月二十六日

遵旨密籌防務摺

光緒六年三月初一日

奏調奎斌片

光緒六年三月初一日

奏摺二十六目錄
請撥海防經費摺

光緒六年三月初一日

請撥南漕摺

光緒六年三月初五日

請獎英法官學官廠洋員摺

光緒六年三月十六日

商局官帑分年抵還摺

光緒六年三月二十七日

覆陳招商局務片

光緒六年三月二十七日

請緩蘆課奏銷摺

光緒六年三月二十八日

毅軍北調請加餉摺

光緒六年三月二十八日

李文忠公奏稿卷三十六

全集一之三十六

桐城吳汝綸編錄

光緒六年正月二十七日

近省隄河工費摺

奏爲光緒五年附近省城隄河歲搶修工段丈尺動支銀數循案開單奏報仰祈

聖鑒事竊照附近省城河道隄工如深澤無極祁州安平博野蠡縣高陽等境之滹沱河瀦龍河隄任邱縣之千里隄安州之南北隄雄縣之南老隄西槐支河隄趙村壩保定縣之清河埝或工段縣長或地居險要皆關民生利害又新開趙王河工長六十餘里節宣西淀漲水蘆僧河工長一百三十里分減大清河水勢均須認真修防前經奏定每年在於清河道庫河淤地租項下撥銀三千兩以爲各工采購料物搶修之用免其造冊報銷經工部覆准仍

令工竣時開單奏報嗣因河淤地租不敷動支又經奏准在於清
河道庫堡船役夫生息項下按年動撥在案光緒五年開凍後即
飭照數撥給銀兩購備椿料責成前署清河道劉樹堂駐工督辦
夏秋雨水較多西北山水匯流逕注各河疊次盛漲隄壩節節出
險屢經該道督率印委分投搶堵茲據會同藩臬兩司將工段丈
尺動用銀數遵照定章詳報前來除民夫土方等項仍歸民辦外
所有搶修椿料用款逐一確核無浮理合開具簡明清單恭摺具
奏伏乞

皇太后

皇上聖靈敕部知照謹

奏

陳占鼈請照原獎片

光緒六年正月二十七日

再臣會保潮州等處勸辦晉豫賑捐出力員紳內有工部主事陳占鼈請以直隸州知州分發省分儘先補用旋經吏部覆稱尋常勞績不准保免補免選應將該員改爲俟補主事後以直隸州知州分發省分儘先補用臣查該員陳占鼈前經臣丁曰昌奏派出洋壘赴新嘉坡暹羅小呂宋檳榔嶼麻六甲各埠竭誠勸辦往返重洋數萬里風濤出沒艱險備嘗捐得賑款實銀八萬兩全活飢民甚眾實屬異常出力業於光緒四年五月二十九日經臣奏明奉

旨陳占鼈著俟事竣後准其從優請獎等因欽遵在案誠以該員遠赴南洋勸集巨款懋著勤勞與尋常勞績不同是以豫爲聲明委予優獎今若改照尋常例章核議實不足以示區別自應欽遵

前奉

特旨優獎仍將該員陳占鼇以直隸州知州分發省分儘先補用
俾昭激勸理合會同前福建撫臣丁曰昌山西撫臣曾國荃河南

撫臣涂宗瀛附片具陳伏乞

聖鑒訓示謹

奏

議購鐵甲船摺

光緒六年二月十九日

奏爲籌辦海防通融挪款先購鐵甲船二隻以壯聲威而備戰守並豫籌交收調撥事宜恭摺仰祈

聖鑒事竊臣疊奉

寄諭籌議海防購船並代福建等省定購蚊船及碰船兼快船以備分布各口等因欽遵在案臣於上年十月覆陳海防摺內聲明南北洋口岸叢雜不能處處設防必購置鐵甲等船練成數軍決勝海上乃能以戰爲守擬擇其與中國海面相宜者酌量訂購荷

蒙

俞旨許爲要論總理衙門籌議南洋海防經費摺內稱土耳其所定八角臺鐵甲船兩隻已發電信詢出使大臣李鳳苞查明如未出售而價不甚昂自應購備臣亦函屬李鳳苞隨時探問旋據函

稱遵由巴黎致書英海部詢以實價若干先因俄人欲購以禦英
故英人急購之今或肯轉售等語又接李鳳苞十二月二十四日
電報八角兩鐵甲英肯轉售兩船實價共英銀五十四萬三千三
百八十磅合中國銀兩核計約二百餘萬兩之譜頃又接李鳳苞
同曰函稱該鐵甲船一名柏爾來一名奧利恩英海部尙書諱屬
當趁中國未開鄰畔之前成議其價分毫不能再讓等語臣前詢
之出洋學生劉步蟾等據稱在英時曾上該船閱過甚爲堅固合
式夫中國購辦鐵甲船之舉中外倡議已閱七年沈葆楨丁曰昌
等斷斷持論以爲必不可緩臣深贊其說祇以經費支絀迄未就
緒近來日本有鐵甲三艘遽敢藐視中國耀武海濱至有臺灣之
役琉球之廢彼旣挾所有以相陵侮我亦當覓所無以求自強前
李鳳苞來函謂無鐵甲以爲坐鎮無快船以爲迎敵專恃蚊船一

擊不中束手受困是直孤注而已洋監督曰意格條議亦謂能與
鐵甲船敵者惟鐵甲船與巡海快船敵者惟快船故鄰有鐵甲我
不可無若僅恃數號蚊船東洋鐵甲往來駛擾無可馳援必至誤
事等語曰意格由法國水師出身現帶藝徒在洋學習製駛聞見
既確多閱歷有得之言西洋均屬蠻國海口水深不似中國各曰
之淺其大號鐵甲喫水至二十六七尺購價至二百餘萬者中國
無所用之且船既笨重能來中國者亦少土耳其八角臺船喫水
十九尺九寸用之中國海面抵禦曰本及西洋來華之鐵甲最爲
相宜且甲厚樣新似出曰本鐵甲之上曰本聞我有利器當亦稍
戢狡謀向來洋廠訂造鐵甲須三年後方能下水今英國旣肯轉
售其柏爾來一船俟訂定後匯給現銀即可來華奧利恩一船須
遲一年後交付值此多事之秋得兩船先後來華稍張聲勢較之

定造需三年之久者緩急懸殊尙覺合算臣與總理衙門往復函商意見相同一面由電信覆知李鳳苞屬其與英海部切實商訂如何分期兌付詳細驗收再行專函商辦惟是此項船價南北洋海防經費以各省關報解甚微積存無幾近又籌購蚊船碰船竭力集款無可再撥若機會一失中國永無購鐵甲之日卽永無自強之日殊屬可惜又查蚊船宣用於內洋淺港之處福建海面寬深臺灣尤形勢孤懸口岸歧錯卽有數號蚊船難敷防守必須得力水軍隨宜策應乃爲活著現擬通融辦法福建已先後奏明定購蚊船四隻碰船二隻內蚊船價銀赫德原定每隻約需銀十五萬兩何璟奏稱兩船約需費三十餘萬圓新式兼碰快船赫德原定兩隻需銀六十五萬兩續又申呈應帶之水雷船未計其內總理衙門奏稱碰船兩隻約需銀六十萬兩均係傳聞之誤臣就赫

德原訂文單核計共該約需實價銀一百三十萬兩似可暫緩購置卽以此款先買鐵甲一號專歸臺灣防勦福建調撥如有一鐵甲輔以原有之福勝建勝兩蚊船再擇船政兵輪之堅利者配之練成一軍料敵所向相機戰守則臺防可固倭患可弭所需款項現有部撥三十萬兩該省奏明籌備三十餘萬圓約得二十五萬兩又奉

旨令續籌六十萬兩果能如數解齊足可抵買鐵甲之用查戶部原撥海防經費福建洋稅釐金兩宗每年應解南北洋者約四五十萬去歲部議准其截留原爲經營臺防起見後山之役現旣停辦亦可撙節若干現據李鳳苞函報柏爾來一船交價後即可赴華臺防尤爲急需自應卽將此船撥歸閩省調用擬請
旨敕下福建將軍督撫臣於稅釐項下籌撥船價合之原有的款

先湊成一百萬兩俟李鳳苞與英定議卽由臣知會剋期匯付以便船價兩交免致失信於人如此則以該省應解之費籌該省應辦之防尤爲義不容辭南洋擬購之碰快船二隻應需六十五萬兩茲抵購鐵甲一船所短約僅三十數萬兩將來或由出使經費續撥或由京外設法勻湊尙易爲力奧利恩一船據稱須一年後交卸亦可分期籌匯價銀俟該船到華臣當與南洋大臣隨時會商調派合之原有蚊碰及各兵輪船練成一軍無論何處有警不分畛域遣令援應庶幾聲威較壯海防稍有端倪大局不無裨益惟英國磅價隨時低昂合之中國銀兩不能豫定確數計兩船磅價合銀二百萬已有盈無紓將來交收及運送來華需費亦不可豫計必應寬籌窄用臣與李鳳苞深知帑項艱紓事竣核實開報斷不任經手者稍有浮冒並請

敕下閩浙督臣船政大臣豫行選派管駕及輪機生徒舵水等六十人赴英隨同所雇洋員在船厯練其學習期滿之學生亦可附搭幫帶回華隨時與李鳳苞函商妥辦至鐵甲船到華以後修船須有隴基上海及廣東黃浦船隴喫水二十尺以內之船尙可設法修理而造就人才尤爲急務駕駛雖有學生肄習而司軍火司帆纜司機器及管事舵水等人亟宜由練船學堂認真教導挑選源源濟用萬不可以遊手充額卽舊有之兵輪船亦宜陸續汰換乃可漸收實效蓋鐵甲船購成後事務正繁措注稍不如法易滋流弊臣旣創斯議不敢置身事外福建所購之船雖專供一省之用將來船到後管駕人員如何遴派敎習西人如何延訂及一切布置之方臣當與閩浙督臣船政大臣隨事商辦冀可漸有進境再近年閩廠經費不敷修船養船復耗其半現有快船圖式及出

洋學生陳兆翹等精通製法終以款絀未能仿造臣比已函商黎兆棠屬其到任後察酌情形停造尋常木船專造快船此項工竣遲速與購之外洋者相等而與鐵甲船相輔並行爲用甚大惟養鐵甲船之費逾於尋常輪船數倍未便責令船政供支查福建一省額設水陸兵數至六萬餘勇營在外今既另設輪船水師則原有所之外海戰船與各路綠營之兵分防之勇當可量加裁減如能於通省中酌去一二成卽以其餉供養鐵甲等船之費綽有餘裕應請

敕下福建督撫臣遵照正月閒

諭旨將水陸師營分別酌量裁汰庶節流卽以開源日久不致竭蹶矣所有籌辦海防通融挪款先購鐵甲兵船並豫籌交收調撥事宜恭摺由驛密陳伏乞

皇太后

皇上聖鑒訓示謹

奏